

Ess dut kalt werrn

Vor e paar Daach hott misch moin Kummbeer Schorsch oogerufe unn gefroochd: Honnes, bissde dehoom? Isch deet gern emol bei dir vorbeikumme.

Ei joo, habb isch gesaad, isch bin dehoom.

E Verrdelstunn später hotts onn de Hausdier geklingeld, ess war de Schorsch.

Kumm eroi, saach isch.

Unn donn sinn merr in die Kisch gonge, de Schorsch hott sisich onn de Disch gesetzt unn isch bin in de Keller unn hab zwaa Flasche Bier eruff geholld. Gleich druff iss die Fraa aus de Bieschelstubb kumme, hott de Schorsch begrießd unn hott gefroochd: Braucht ihr Männer Gläser odder trinkderr aus de Flasch?

Mir trinke aus de Flasch, saach isch, gell, Schorsch?

Ei nodierlich, moont de Schorsch, unn mir hawwe ,Prost, gesaad unn hawwe enn große Schluck genumme.

Doo frächt die Fraa: Braucht ihr misch? Odder kann isch meddem Bieschele weider-mache?

Isch habb die Achsele gezuckd. Isch waaß joo nitt was de Schorsch will. Unn donn habb isch gefroochd: Schorsch, hosde mett mir genuch beim Schwätze?

Ei joo, gibt de Schorsch ze Antwort.

Donn gieh isch widder, seet die Fraa unn iss fortgonge.

Was hosden uffem Herze?, frooch isch de Schorsch.

Doo seeder: Ei weesche dem Heize, doodriwwer wollt isch emol medder redde. Mir heize mett Gas genau wie ihr unn dess soll joo su deier werrn, dass merr omm Beste die Heizung garnitt oomache dut. Awwer dess gieht joo nitt. Was machden ihr?

Ja, saach isch, mir hawwe joo enn Kaminofe in de Wohnstubb, awwer der iss zum Heize nimmi zugelosse, außer mir deede ferr den su en spezielle Filter ferr foine Staab irschendwo hiehsetze losse.

Bei uns isses genau su, seet de Schorsch, aach mir hawwe su enn Kaminofe, e schee gusseisern Stick, der schee oozegugge iss. Den derrfe merr ohne Filter aach nitt benutze

Ess iss joo nitt nor de Ofe unn de Filter, saach isch, mir hawwe außerdem koo Holz mieh unn dessdeweesche fällt dess Heize mett dem Ofe aus. Also was mache merr: Jetzt ferr die lwwergongszeit losse merr ab unn zu su enn Heizlüfter laafe unn wennis werklisch kalt werdd halt die Heizung. Donn werrn all die Heizkörper, die merr grad nitt brauche, abgedreht unn nor derjenische werdd uffgedreht, wo merr uns grad uff-halle dun. Unn dess misse merr halt bezahle.

Doo seet de Schorsch: Wer hätten geglaabd, dass mir in unserne alde Daach noch su ebbes erlewe. Honnes, leits onn de Bolidik?

Schorsch, saach isch, wenn merr all die babbele heert im Fernseh konns oom iwwel werrn. Friher hawwe merr immer gesaad, ess werdd nix su heiß gesse wies gekochd werdd. Awwer mittlerweile hott merr de Oidruck, als wenn all die Köch in Berlin enn gons haaße Brei koche, awwer donn drumerum redde, um nor nitt die Leit ze erschrecke. Waaßde Schorsch, wonn merr wisse, dass merr nimmi mett Gas unn Strom heize kenne? Wenn de Staat nitt Geld, naa, wanner jedem vunn uns enn Dauneschloofsack zukumme lāsst, um uns owends in de Wohnstubb demett oizewiggele.

Doo hott de Schorsch die Flasch Bier genumme unn misch demett oogestumbt: Host Recht, Honnes. Awwer su long merr unser Bier nitt im Schloofsack oowärme misse, kann uns nix bassiern.

Eiern Honnes